

## ■ CUMINONZA ROMONTSCHA FLEM

## Tgei schabegia cun la Senda linguistica da Flem?

(cp) Dacuort ha la Cuminonza Romontscha Flem (CRF) salvau sia radunonza annuala. Il program annual, l'instrucziun da romontsch en scola e la Senda linguistica Foppa-Scheia ein stai el center digl interess dalla radunonza.

## Program 2018

Propostas per il program annual havevan ils presents giu retschert cun l'invitaziun. La radunonza ha giu da sclarir tgeininas da quellas che la CRF dueigi realisar. Il s'entupar stat era uonn el center dil program. Sentupadas che serepetan ein las Paterladas. Dapi in onn s'entaupa la CRF mintgamai igl'empre mardis dil meins allas 09.30 per ina Paterlada el Café Postplatz. Sper las commembras ed ils commembers ein leu era autras persunas da Flem e contuorn ch'han plascher dil romontsch envidadas. Sentupadas possibiliteschan era ils survetschs divins romontschs. Per 2018 ein siat survetschs divins planisai. Tier tschun setracta ei da priedis romontschs e tier dus da messas romontschas. Ils termins san ins anflar sin la pagina d'internet dalla CRF [www.romontsch-flem.ch](http://www.romontsch-flem.ch). Els vegnan era publicai en la «Ruinaulta». Suenter ils survetschs divins dat ei regularmeins sentupadas u el Fiderhof ni en la Sentupada dalla baselgia catolica. Autras sentupadas dat ei tier las seras da giugs dils 11 da matg e 26 d'october e la viseta planisada el Museum da skis da Sport Beat. Ina occurrenza ei planisada ordeifer la vischnaunca da Flem. La CRF vegn a far ils 18 d'ost ina excursiun en la baselgia da Pleif a Vella ed el Mulin da Morissen.

## Romontsch en scola

A caschun dalla radunonza ei il tema «Romontsch en scola» vegnius temati-



Tabla sin la Senda linguistica da Flem.

MAD

saus. David Flepp – sco promotur regiunal dalla Lia Rumantscha – ha saviu rapportar ch'il romontsch vegni instruius a Flem a tut las scolaras e scolaras dalla emprema e secunda classa d'oras duas uras ad jamna. Uonn frequentien 34 scolaras e scolaras quella instrucziun. Ils affons dalla secunda classa respectivamein lur geniturs retschevien per brev mintgamai l'incumbensa da sedecider denter cuntinuar cun romontsch ni eleger talian en la tiarza classa. Pil mument detti ei negins scolaras dalla tiarza tochen sisavla classa che

prendien romontsch. Sin scalem superriur detti ei denton in ni l'auter ch'elegi puspei romontsch. Per l'auter onn da scola setracta ei da dus scolaras da Flem. Quels frequentien lu romontsch ensem cun momentan quitordisch scolaras da Trin. Ina scolasta primara fetschi sco project era brats da scola cun las empremas classas dalla scola da Schluein. Ils affons scrivien in a l'auter brevs e s'entaupien magari era. Aschia vesien ils scolaras da Flem che quei lungatg vivi e vegni d'oras da scolaras ch'habiteschien dama-

neivel. L'idea da far dis respectivamein jamnas da project cul tema «lungatg e cultura romontscha» vegni promovida dalla Lia Rumantscha cun different material d'instrucziun.

Las informaziuns davart da Flepp han evocau tiels presents differents resuns. Igl ei vegniu giavischau da sclarir la damonda dil svilup dil romontsch en las scolaras da Flem in summa, quei vul dir co il romontsch seigi vegnius instruius pli baul a Flem e cons scolaras hagen frequentau quel. La discussiun ha mussau ch'il ro-

montsch en las scolaras da Flem ha trapassau differentas fasas. El 19avel tschentanner seigi vegniu instruius romontsch tochen la sisavla classa. En scola superiura vegneva ei midau sin tudestg. Il turissem hagi lu contribuui a sviluppar la tenuta che la glied stoppi saver tudestg. 1903 seigi ei schizun stau scumandau da tschintchar romontsch sil plaz-scola. 1910 seigi l'instrucziun stada tudestga. 1930 vegnevi ei denton instruius duas uras romontsch ad jamna. Sch'il scolast savevi buca romontsch, lu laschavi el star quei rom dalla vart. Quellas informaziuns interessantas han svegliu igl interess pil tema, aschia che la suprastanza vegn a sclarir co ins sa schaffir tier quella damonda dapli trasparenza.

## Senda linguistica

Sco il president dalla CRF Hanspeter Meiler ha rapportau ei la suprastanza sedada giu igl onn vargau intensivamein cun la Senda linguistica Foppa-Scheia. Avon in onn havevi ella constatau che differentas tablas seigen buca pli actualas e ch'ins stuessi modernisar certas parts. Ensem cun Flepp sco promotur regiunal dalla Lia Rumantscha hagi ella el decuors digl onn sclarir la damonda co proceder. Ina sesida dad el sco president e digl actuar cun differents exponents da Flem hagi mussau la necessitad d'evendar biros da grafists da far offertas per ina collaboraziun davart migliurar la Senda. Proximamein seigen las offertas da valetar. La damonda tgei che schabegia cun la Senda actuala vegn il proxim temp medemamein a fatschentar la suprastanza.

Ina tabla dalla Senda linguistica. Cun mieds actuals (p. ex. QR-Code) savess ins per exempel tedlar la canzun dil bau cul telefonin. En quei cass settractass ei da modernisar la senda.